

2 PETRO

Petro Ovoli Oyade

¹ Ovoli kīi to yī, Simon Petro, Yesu Kristo osumune mo foto onyane sekē. Ntsele ye mamena bati a kī betsā boe Baguma mo boe Otene Yesu Kristo tuwī kakena akū bena katekado kī kideī koya nde boe kade a aye.

² Baguma konyakamo, mo ye lukudo lepo ne mi akū, ayekī miabuki minyi ye mo Yesu kī enye boe Olate a mibu.

Ayekī Baguma Ve Bati Epau Be.

³ Baguma kōa ye moawe kōbē ekpa boe letsa nye letsa a kī busī ne nkpā kame a faa kī bupuli budzi nkpā busum ye kasum wī. Ekena fukīi enee yabumo boe kī bunyi oti a kī ene boe kī boyaana tsefā ne ye moawe kukūkpale mo tuwī kakena a kame.

⁴ Baguma tsā osi kīi akū ete boe fotsa kpale mo koya a kī ele eyi a, ayekī bōapuli bōtsā futetsa kīi akū bulo ne fotsa kpa kī foako oti odo kī foawola oti ne katinya onukpē, lokōa bōtsā foe akū bōna tsefā ne Baguma kutidu a kame.

⁵ Ne fukīi sū, mibōa mbodi mikōa tuwī kakena mibumo mi katekado. Ade ayea kadikanyi kibumo mi tuwī kakena,

⁶ akū kanya kibumo kadikanyi, owole kado kibumo akū kanya, Baguma kavila kibumo owole kado.

⁷ Mikɔa tɔwaɛ kakena ne Kristo kame mibumɔ Baguma kavila, ade mikɔa ɔdo mibumɔ tɔwaɛ kakena a.

⁸ Nte mideĩ ɔbla kĩ mɔ ete mi kame flee ni, fɔafɔ mikabɔa mbɔdi, mi akũ lena nfasɔ, ne ayekĩ minyi boe ɔlate Yesu Kristo sũ.

⁹ Lemɛ nte ɔbla kĩ leláa odi kame ni, kekɔ eku anɛ eyua, kĩ eláapuli emɔ mɔ lugo, ade yalɛla tɔkpa a kĩ ekɛna etɛ a kĩ Baguma wɔla ne ye akũ a.

¹⁰ Foesũ, nwaɛ amɛ, mibɔa mbɔdi mɔ ɔsĩ miba kɔkɔɛ, mido akũ ɔsĩ mifɔ kavɛ a kĩ Baguma ve mi, mɔ kapau a kĩ epau mi a, fɔnya fɔtsa kɔlɛwa fɔkpa mi. Nte mikɛna foe lomɔ ni, miláamuniki ne mi katekado a liti.

¹¹ Nte fɔtsã osi kĩ akũ a, baakpa mi osi faa miwo ne boe ɔlate mɔ boe ɔtenɛ Yesu Kristo legākanyakɔ a kĩ kɛwaa daa a kame.

¹² Titɔ kĩ minyina fɔtsa kĩ kɔkɔɛ, midzɛ pintii ne ɔnɔkɔali a kĩ bɔtsa mi a kame malo ni, mawɛ kĩ makate mi foe anɛ luwi daa.

¹³ Mbu kĩ, kĩ ndzi kpã ni, fɔnɛnɛ kĩ nkaanyina mi ne fɔlɛtsa kĩ akũ.

¹⁴ Īnyina kĩ owi leláabuna mɔ maaku nde ayekĩ boe ɔlate Yesu Kristo nye etsa yĩ pefee a.

¹⁵ Ne foesũ maabɔa mbɔdi ntsa mi osi a kĩ ne yĩ wuda liti ni, míapuli mite anɛ ne fɔtsa kĩ akũ lɔko nye lɔko.

Bati a Kĩ Bemó Kristo Kukũkpale a.

¹⁶ Nné tugu kĩ bɛmɛ ne nyansã kame bɔkɔa bɔlɛ boe ɔlate Yesu Kristo kaya ne kɔbɛ kame a bɔtsa mi. Boe mɔawɛ a lemɔ ye kɔbɛ, obu mɔ kukũkpale a mɔ anɛ.

17 Bɔna ne awã luwi a fɔmɔ Baguma boe ɔlega a kɔa ye obu mɔ kukũkpale ekpa ye, ade odo to ode ne Kukũkpale Flee ɔlate a sekẽ ele kĩ, “Ade yĩ Obi kĩ maátunɔ kale a. Yawo yĩ ane.”

18 Boe mɔawe a linu odo kĩ kĩ eto ode ne lɔkɔ a kĩ bɔna ne ye sekẽ ne ɔto kpalewa a akũ.

19 Ne foesũ boe mbom bɔte Baguma onukpẽ banyene letsã a kĩ bide ne ye akũ a budo bɔba. Mibɔa mbɔdi mipi ɔledo a kĩ ela nde ɔsedza kĩ yavɔle ne ɔtũ kame a mido mɔ akũ, kenaawo odenyinawi kĩ ɔnɔne lisibii a aade levɔle ne mi towɔle kame.

20 Leme letsa a kĩ lebẽ foe flee nye kĩ, mite ane kĩ odima leláapuli enye Katsela Kpalewa fɔletsã a kĩ bele biyi a kayɔ ne ye mɔawe akũ akũ.

21 Kitonekĩ Baguma onukpẽ banyene fɔletsã fudima táto otidziwa kawɛ kame fɔya tã da, mbom Hũhũ Kpalewa a kɔbẽ lefɔ bati le Baguma ɔledo a biyi.

2

Petro Kpa Kɔde Ne Bavãlevã Fɔtsa Batsane Akũ.

1 Nde ayekĩ fɔvã onukpẽ banyene né ne bati kame kɔkɔe a, ade ayea bavãlevã fɔtsa batsane aane ne mi kame a. Baatsã tedake kame beyamena fɔvã fɔtsa katsa a kĩ fɔabula bati kade, ade baasĩ boe ɔlate a kĩ eya be ete be nkpã a malo. Be fɔsakelawa aafɔ bewɔla be mɔatse.

2 Bati pii aatomɔ be ɔbla kpa kabɔa a liti, ade ne fɔvã fɔtsa batsane a sũ ni, bati bebã aale kɔdzela kpa bitia ɔnɔkɔali osi a.

³ Ayekĩ bavãlevã fotsa batsanẽ kĩĩ deĩ anengbã nẽ sika akũ sũ ni, baatsã tedake mɔ fovã kame bena mi akũ nfaso. Lemẽ Baguma kɔ be kɔto eyi ane kɔkɔkɔe, ade Oti a kĩ yaawola be a lemẽ lanye ane nẽ be akũ!

⁴ Baguma támɔ ye ode foto banyanẽ a kĩ bekẽna tokpa a konya, mbom edo be nkɔsonkɔso, eta be edo nẽ fi kĩ foádĩ da a kame, awã kĩ bideĩ nẽ otũ kame badzole kadze Luwi a.

⁵ Ade ayea Baguma támɔ atitifɔ katinya bati a konya a. Efɔ mui kayili wola bati a kĩ betávila Baguma nẽ katinya kame flee a, mbɔente Noa kĩ ede letsã nẽ nkpã kadzi kpĩĩ akũ, mɔ bati evũkɔnɔ bebã odi Baguma nyẽ nẽ foe kame.

⁶ Baguma kɔ Sodom mɔ Gomora temato tekpale tekpale a kɔto, ade efɔ fi wola te bubloo tedani batɔ nenẽ a. Ekẽna be kĩ benya nfantuhũ bekpa bikĩ baávila Baguma a letsa a kĩ laaya nẽ be akũ.

⁷ Lemẽ Baguma nyẽ Lot, oti kpĩĩ kĩ bati obla kpa kabɔa kaha ye owole.

⁸ Oti wĩ kĩĩ dzi nẽ be kame, ade be obla kpa a kĩ ekamɔ ekanu mɔ be titikpa a kaha ye owole luwi nyẽ luwi.

⁹ Nẽ foesũ boe Olate nyina ayekĩ yanyẽ bati a kĩ bavila ye a etomena be sohuiẽ kame, mɔ ayekĩ yafɔ bati kpa aana nẽ soto kavele kame bekɔa bedzole kadze luwi a.

¹⁰ Yakẽna foe titiliwu nẽ bati a kĩ bitomɔ sukẽna fowetsa kpa kĩ foako odo liti, kĩ foesũ baábu Baguma otumi kĩ yanya be akũ a kado nẽ letsama kame.

Fovã fotsa batsanẽ kĩĩ deĩ ane osĩ, ade badela be akũ nẽ ode a. Baákɔa obu kakpa ode bati

kpalewa a, ade nte bale tɔkpa ne be akū malo ni, akū lányene be.

¹¹ Baguma ode foto banyane a kī bideĩ kɔbē mɔ otumi bebē fɔvā fɔtsa batsane malo a lákɔa fɔletsa kpa katsua be onukpē ne boe ɔlate a ane.

¹² Leme bati kī la nde bayae kpa kī belá adzuni, kī katinya nye be kī bati bipili be beko. Bale fɔletsa kpa ne letsa nye letsa a kī betánu de kayɔ a akū. Baguma aawola be nde ayekī batidziwa awola tuwī kame bayae.

¹³ Baamɔ lubo ne lubo a kī befɔ bati mó a sū. Be kawole nye kī bekena be sukena fɔwetsa kpa fudi nye fudi ne suwa ketee. Benye konyoã mɔ tuduli fɔtsa bakenane, ade nte mi mɔ be midzi mianya a, bamɔ kawole ne be bati kake tisi a akū.

¹⁴ Bideĩ ane kī yamɔ batsole adɔpaafɔ, ade ane a kakɔa kakena tɔkpa láplo be a. Bavele bati kī be katekado ledzé pintii kado ne tɔkpa kame. Bavele be akū bekpa anengbã. Baguma kadumu tomɔ be!

¹⁵ Befone ne osi kpī a awe, ade beyela osi a. Betsã osi a kī Balam, Boer obinyole a tsã a. Balam mɔ kawole ne sika a kī yaana etomena tɔkpa kakena kame a akū.

¹⁶ Leme Baguma kã ye ane ne ye tɔkpa a sū. Ye mɔawe aflimu kī enone le kodzela mɔ oti odo, ade esua onukpē onyene a fɔbɔdamtsa kakena osi a.

¹⁷ Fɔvā fɔtsa batsane kī la nde fɔwɔke kī fuviõ, ñye luflututu kī ɔwe mɔ osi abɔa kanamena. Baguma mane kadzikõ eyi ekpa be ne ɔtū kpli kame.

¹⁸ Bale kodzela mɔ akū kata, kale fɔkɔasiatsa leme. Bakɔa sukena fɔwetsa kī fɔako odo kake

bikĩ owi tábuna kĩ bilo ne amamu kadzi kame.

¹⁹ Bakpa be ane kate ne akũ akũ kadzi akũ, leme be moawe a benye obla kpa a kĩ yawola bati a basate, kitonekĩ letsa a kĩ lenya oti akũ ni, oti a adani osate ekpa letsa a.

²⁰ Nte bati tsã boe Olate mo Otene Yesu Kristo kanyi kame bilo ne katinya kame fotsa a kĩ foado oti efii sekẽ, mó obla a na muniki ewo ne be kame enya be akũ ni, bati a na nkpã awunade a abu kade kaba atonyade a.

²¹ Nte kanyi kii betanyi letsama ne kadzi ne osi kpĩ akũ ni, kufe fonene kolaa fokpa be keba kĩ binyi osi wĩ kii leme bibuki bimuniki ne mbla kpalewa a kĩ Baguma kpa be a liti.

²² Letsa a kĩ leya ne be akũ a atsa kĩ fogbã kii nye onokoli kii, “Okpete amuniki kanaaboe ye moawe tedã,” ade, “Oplakuo kii bewola ye mui yededeede amuniki kanaato todõ.”

3

Mimane Akũ Mikpa Boe Olate Kabuki Kaya.

¹ Nwaẽ ame kii maátunõ kale, ade ovoli oyade kii ntsese mamena mi a. Ne tuvoli nviã a kame a, nwe kii manyina mi adzuni ne fotsa wĩ kakena akũ, nde foletsa kakai aye.

² Mawe kii mite ane ne foletsa a kii Baguma onukpẽ banyene kpalewa a le biyi ane kókoe a, mo tebla a kii mi foto banyane a te bitomena boe Olate mo Otene sekẽ bema mi a akũ.

³ Minya lotõ minu foe kayõ kii ne fuwi nkae a kame ni, nsekuo badine aaya. Baadzi nkpã ne be sukena fowetsa kii foako oti odo onukpẽ bidi mi nsekuo.

4 Ade baale kī, “Ele eyi kī yaaya. Nde ye? Kitonekī ane kī boe bawanyo ku keyawo finyaa, ade ayea letsa nye letsa buki lidei nde ayekī fona kī Baguma boa katinya a!”

5 Bibua pa bisī onokwali a kī ane kokoe mo Baguma kōa kale eboa tite mo ode. Ekena tite etomena mui kame, tedzē ne mui kame,

6 ade mui leme, mui a kī biyili a ekōa ewola katinya kōe a.

7 Ade Baguma kale moape kīi pini tite mo ode a kī fudei finyaa, ade emanē foe eyi kī yaakōa fi ewola foe a. Baguma manē foe eyi ekpa kadze luwi a kī yaawola bati a kī betávila ye a.

8 Leme nwaē ame kī maátuno kale, mitalela kale moa kīi! Ade ke nye kī ne boe Olate sekē ni, luwi moa la nde futeli apim, ade futeli apim leme la nde luwi moa a.

9 Ne badi kakōna onukpē ni, boe Olate lāna sowa ne letsa a kī ele eyi a kakena akū. Fólá lomo, mbom owole boee edei ekpa mi, kitonekī yaáwe kī odima eyaawo, mbom yawe kī bati flee bedani towole kame.

10 Leme boe Olate Luwi a aaya nde ayekī oyekpane aya a aye. Ne luwi a akū ni, ode aatē enaa ne odo kpaa kane kame, ade odetó kame fotsa flee a aatē fuvio fowo, ade tite mo te akū fotsa flee leme aavio a.

11 Foesū nte baawola fotsa kīi flee ne osi kīi akū ni, bati bawodabe odu kene kī mianya? Kene kī miboa obla kī ekpale, mikōa mi akū flee misum Baguma,

12 ne loko a kī midzi miadzole Baguma Luwi a mo akū kasī kī leya moatsē. Ade luwi a mo ode

aapi fi evio, ade fi ɔwe a aanyinyina odetó kame fotsa flee a.

¹³ Leme boe kɔ ne Baguma kalekayi onukpẽ ni, boadzole ode voẽ mo tite voẽ, awã kɔ fotsa wɔ kakena te toto.

¹⁴ Foesũ nwaẽ ame, kɔ miadzole boe ɔlate Luwi a ni, mibɔa mbodi kɔ míanya bati kpalewa, kɔ nfumusulu léláa mi akũ ne Baguma ane, mbom lukudo lena ne mimɔ Baguma kayite.

¹⁵ Kene kɔ boabu boe ɔlate a ɔwole boe kana kakpa boe a nde osi kɔ ebinya ekpa mi kɔ mina nkpã kate. Ade foletsa kɔ boe ɔwene Paulo malo tsele ema mi ne nyansã a kɔ Baguma kpa ye a onukpẽ a.

¹⁶ Ade letsa a kɔ yale ne foletsa kɔ akũ ne ye tuvoli a kame a. Ye tuvoli a kame foletsa a fudi kayo kanu deĩ osi. Ne foesũ bati a kɔ binyina tuvoli mo bikɔ betátim ne be katekado kame a adani foe kayo kanye, nde ayekɔ bakena mo Katsela Kpalewa foletsa bebã a fudi. Fukɔ kakena aafɔ bewola be akũ.

¹⁷ Leme mi yɔ bakɔba, minyina fukɔ kɔkɔe. Foesũ midã mi akũ kadã wɔ ayekɔ bati a kɔ baábu mbla a léláanye kudu ne mi abɔa kayo mine mitɔ!

¹⁸ Mibo ane ne boe ɔlate mo ɔtene Yesu Kristo konyakamo mo kanyi kame. Ye kade nye kukukpale kito finyaa kanaa daa. Fɔya lomo.

Tuwuli

Tuwuli: Baguma Apam Vɔɔ a Tuwuli New Testament

copyright © 2008 Wycliffe Bible Translators, Inc.

Language: Tuwuli

Contributor: Wycliffe Bible Translators, Inc.

All rights reserved.

2025-04-29

PDF generated using Haiola and XeLaTeX on 28 Apr 2025 from source files dated 29 Apr 2025

68df0193-2981-5275-8994-8f743fe01e5e